



9. september 2022

UKA2022/179

Inatsisartut Suleriaasianni § 36 malillugu apeqquteqaat aallaavigalugu oqallinnissamik imaattumik siunnersuuteqarpunga:

Qanoq iliorluta Aningaasanut inatsit aqqutigalugu Inuit malunnaatilimmik nersortarialimmillu inuiaqatigiit akornanni suliniuteqarsimasut, aamma takutitsisartut ilanngullugit, inuunermik sinnerani Inatsisartut aqqutigalugit pisartagaqartalersissinnaanerat pillugu apeqquteqaat aallaavigalugu oqallinnissamik siunnersuut.

(Inatsisartunut ilaasortaq Jens Kristian Therkelsen, Siumut)

Tunngavilersuut:

Inuiaqatigiit ingerlaavartuvugut, tamatumalu kingunerisaanik nalaattuartarpagut ulluinnarni assigiinngitsunik annertuunik suliaqartartut, inuiaqatigiinnut annertuumik malunniuttartunik pilersitsisartut, aamma nersortarialimmik iliuuseqartut, angusaqartut immikkullu isigineqartariaqartutut inuit inississinnaasartut.

Nalunngilara inuit immikkut nersortariaqartut tunissuteqarfingineqartartut, ilaatigut ataqqinaammik saqqarmiulerneqartarlutik, tamakkulu ataqqilluinnagassaraagut ataqqiuassallugillu.

Taamatut nersornaasiisoqartillugu qujanartumik inuiaqatigiit ataatsimoortutut qanitariittut attortillatalu pisarpugut, taamatullu nersorniakkat ataqqinerullugit pilertutut ittarluta.

Qallunaat aningaasanut inatsisaani aammattaaq inuit equmiitsuliortut, atuakkiortut il.il nersortariaqartutut isigineqartut inuunertik tamaat pisartagaqartinneqartarput.¹

Siunnersutigaara tassunga assingusumik Aningaasanut Inatsit aqqutigalugu inuit malunnaatillit, assersuutigalugu qulit, inuunermik sinnera pisartagaqartinneqartalissasut, taamaasiornikkut inuiaqatigiit inunnut pineqartunut pissusissamisoortumik tunniussaqartalernissaattut isigigakku.

Aningaasaateqarfiliornissaq takorloorpara, aningaasaateqarfillu immikkut aqutsisulerneqarluni ingerlanneqassasoq pissusissamisoorsorinerutillugu.

Taamak oqaaseqarlunga siunnersuut Inatsisartunut suliassanngortippa, neriullunga siunnersuut ilassilluarneqassasoq.

¹ <https://www.retsinformation.dk/eli/lt/2019/469>